

永平府志

卷五十五列傳七續  
卷五十六列  
傳八在職一

永平府志卷五十五

列傳七 鄉賢二

**宋**

王審琦字仲寶其先遼西人後徙事洛陽漢乾祐初隸周祖帳下性純謹甚親任之從平李守貞以功署廳直左番副將廣順中歷東西班行首內殿直都知鐵騎指揮使從世宗征劉崇力戰有功遷東西班都虞侯改鐵騎都虞侯轉本軍右第二軍都校世宗召禁軍諸校宴射苑中審琦連中的世宗嘉之賞賚有加俄領勤州刺史親征淮南舒州堅壁未下詔以郭令

永平府志

卷五十五

鄉賢二

一

圖領刺史命審琦及司超以精騎攻其城一夕拔之擒其刺史獲鎧仗軍儲數萬計令圖旣入城審琦等遂救黃州數日令圖爲舒人所逐審琦選輕騎銜枚夜發信宿至城下大敗舒人令圖得復還治所世宗嘉之授散員都指揮使又破南唐軍於紫金山先登中流矢轉控鶴右廂都校領虔州團練使世宗圍濠州審琦率敢死士數千人拔其水砦奪月城濠州遂降及攻楚州爲南面巡檢城將陷審琦意淮人必遁設伏待之少頃城中兵果鑿南門而潰伏兵擊之斬數千級繫五千餘人獻於行在賜名馬玉帶錦綵數

百匹淮南平改鐵騎都校又從平瓦橋關恭帝卽位  
遷殿前都虞候領睦州防禦使宋初擢爲殿前都指  
揮使領泰甯軍節度從征李筠爲御營前洞屋都部  
署爲飛石所傷車駕臨視澤潞平改領武成軍節度  
李重進叛副石守信爲前軍部署討之建隆二年出  
爲中正軍節度在鎮八年爲政寬簡所部邑令以罪  
停其錄事吏幕僚白令不先咨府請按之審琦曰五  
代以來諸侯強橫令宰不得專縣事今天下治平我  
忝守藩維而部內宰能斥去黠吏誠可嘉爾何按之  
有聞者歎服開寶二年從征太原爲御營四面都巡

檢三年改鎮許州賜甲第留京師太祖嘗召審琦宴  
射苑中連中的賜御馬黃金鞍勒六年與高懷德並  
加同平章事七年卒年五十初審琦暴疾不能語帝  
親臨視及卒又幸其第哭之慟賜中書令追封瑯琊  
郡王賻贈加等葬日又爲廢朝審琦重厚有方略尤  
善騎射鎮壽春歲得租課量入爲出未嘗有所誅求  
素不善飲嘗侍宴太祖酒酣仰祝曰酒天之美祿審  
琦朕布衣交也方與朕共享富貴何靳之不令飲邪  
祝畢顧謂審琦曰天必賜卿酒量試飲之勿憚也審  
琦受詔飲十杯無苦自此侍宴常引滿及歸私家卽

不能飲或強飲輒病子承衍承術承德承祐承俊承  
偓承僎承僅承休承德西上閣門使會州刺史承祐  
至如京使承俊承僎至內殿崇班承偓至閣門祇候  
承僅至左神武將軍致仕承休至內殿承制

宋史

陳思讓字後已幽州盧龍人父審確仕後唐至晉歷檀  
順涿均沁唐祁城八州刺史預征蜀權利州節度終  
金州防禦使思讓初隸莊宗帳不卽位補右班殿直  
晉天福中改東頭供奉官再遷作坊使安從進叛於  
襄陽以思讓爲先鋒右廂都監從武德使焦繼勳領  
兵進討遇從進之師於唐州花山下急擊大破之從

進僅以身免以功領獎州刺史從進平授坊州刺史  
八年冬契丹謀入寇以思讓監澶州軍賜鞍勒馬器  
帛討楊光遠于青州也又爲行營右廂兵馬都監兵  
罷改磁州刺史會符彥卿北征契丹思讓表求預行  
未幾改衛州連丁內外艱時武臣罕有執喪禮者思  
讓不俟詔去郡奔喪聞者嘉之起復隨州刺史漢初  
移淄州罷任歸朝會淮南與朗州馬希萼合兵淮南  
攻湖南馬希廣來乞師旋屬內難又周祖北征乃分  
兵令思讓往郢州赴援兵未渡而希廣敗思讓留於  
郢周祖卽位遣供奉官邢思進召思讓及所部兵還

劉崇僭號太原周祖思得方略之士以備邊遣思讓率兵詣磁州控陜澤潞未幾授磁州刺史充北面兵馬巡檢未行陞磁州爲團練卽以思讓充使廣順元年九月劉崇遣大將李瓌領馬步軍各五都鄉兵十都自團柏軍於塞子店思讓與都監向訓張仁謙等率龍捷吐渾軍至虎亭西與瓌軍遇殺三百餘人生禽百人獲崇偏將王璠曹海金馬五十匹俄遣王峻援晉州以思讓與康昭分爲左右廂排陣使令率軍自烏嶺路至絳州與大軍合崇燒營遁去思讓又與藥元福襲之俄命權知絳州明年春遷絳州防禦使

顯德元年九月改亳州防禦使充昭義軍兵馬鈐轄屢敗并人及契丹援兵遷安國軍節度觀察留後充北面行營馬步軍排陣使五年敗并軍千餘於西山下斬五百級是秋邢州官吏著艾邢銖等四十人詣闕求借留思讓詔褒之十二月改義成軍節度觀察留後六年春世宗將北征命先赴冀州以俟命及得瓦橋關爲雄州命思讓爲都部署率兵戍守世宗不豫還京留思讓爲關南兵馬都部署恭帝嗣位授廣海軍節度宋初加檢校太傅乾德二年又爲保信軍節度時皇子興元尹德昭納思讓女爲夫人開寶二

年夏改護國軍節度河中尹七年卒年七十二贈侍  
中思讓累厯方鎮無敗政然酷信釋氏所至多禁屠  
宰俸祿悉以飯僧人目爲陳佛子身沒之後家無餘  
財弟思誨至六宅使子欽祚累遷至香藥庫使長州  
刺史欽祚子若拙

宋史

陳若拙字敏之幼嗜學思讓嘗令持書詣晉邸太宗嘉  
其應對詳雅將縻以府職若拙懇辭太平興國五年  
進士甲科解褐將作監丞通判鄂州改太子右贊善  
大夫知單州以能政就改太常丞遷監察御史充鹽  
鐵判官益州繫囚甚眾太宗覽奏訝之召若拙面諭

永平府志

卷五十五

鄉賢一

五

委以疏決遷殿中侍御史通判益州淳化三年就命  
爲西州轉運副使未幾改正使召歸會李至守洛都  
表若拙佐治改度支員外郎通判西京留司久之柴  
禹錫鎮涇州復奏爲通判遷司封員外郎部送芻糧  
至塞外優詔獎之入爲鹽鐵判官轉工部郎中與三  
司使陳恕不協求徙他局改主判開拆司車駕北巡  
命李沆留守東京以若拙爲判官河決鄆州朝議徙  
城以避水患命若拙與閻承翰往規度尋命權京東  
轉運使因發卒塞王陵口又於齊州浚導水勢設巨  
隄於采金山奏免六州所料梢木五百萬民甚便之

河平眞授轉運使召還拜爲刑部郎中知潭州三司使缺若拙自謂得之及是大失望因請對言父母年老不願遠適求納制命上怒謂宰相曰士子操修必須名實相副頗聞若拙有能幹特遷秩委以藩任而貪進擇祿如此往有黃觀者或稱其能選爲西川轉運使輒訴免當時黜守遠郡今若拙復爾亦須譴降凡用人豈以親疏爲閒苟能盡瘁奉公有所樹立何患名位之不至也乃追若拙所授告敕黜知處州徙溫州代還復授刑部郎中再爲鹽鐵判官改兵部郎中河東轉運使賜金紫會親祀汾陰若拙以所部緡

帛芻粟十萬輸河中以助費經度制置使陳堯叟言其幹職擢拜右諫議大夫徙知永興軍府時鄰郡歲饑前政拒其市糴若拙至則許貿易民賴以濟又移知鳳翔府入拜給事中之澶州蝗旱之餘勤於政治郡民列狀乞留天禧二年卒年六十四錄其子映爲奉禮郎若拙多誕妄寡學術當時以第二人及第者爲榜眼若拙素無文故目爲瞎榜眼

宋史

姚內斌平州盧龍人少仕契丹周顯德六年太祖從世宗征次瓦橋關內斌以城降世宗以爲汝州刺史國初從平李筠改虢州又爲慶州刺史在郡十數年戎

不敢犯塞號內斌爲姚大蟲言其武猛也初內斌降其妻子皆在契丹乾德四年子承贊密自幽州來降五年幽州民又以內斌兒女六人閒道來歸太祖並召見厚賜之送還內斌卒年六十四常賻外賜其子田三十頃承贊爲供奉官閤門祇候死於陣

宋史

郭瓊平州盧龍人祖海本州兩冶使父令奇盧臺軍使瓊少以勇力聞契丹爲蕃漢都指揮使後唐天成中挈其族來歸明宗以爲亳州團練使改刺商州遷原州清泰初移城壘未葺蜀人屢寇瓊患之因徙城保險民乃無患受詔攻文州拔二十餘砦生擒數百人

永平府志

卷五十五

鄉賢一

七

晉天福中移刺警州屬羌渾騷動朔方節度張希崇表瓊爲部署將兵共討平之連領滑坊虢衛四州開運初爲北面騎軍排陣使陽城之役戰功居多改沂州刺史充荆砦主兼東面行營都虞侯擒莫州刺史趙思以獻改刺淮州俄爲北面先鋒都監契丹陷中原盜賊蠡起山東爲甚契丹主命瓊復刺沂州以禦盜瓊卽日單騎赴郡盜聞瓊威名相率遁去漢乾祐中淮人攻密州以爲行營都部署未至淮人解去會平盧節度劉銖恃佐命之舊稱疾不朝將相大臣懼其難制先遣瓊與衛州刺史郭超以所部兵屯青州



銖不自安置酒召瓊伏壯士幕不欲害瓊瓊知其謀  
屏去從者從容就席略無懼色銖不敢發瓊因爲陳  
禍福銖感其言遂治裝俄詔至卽日上道瓊改潁州  
團練使又加防禦使時朗州結荆淮廣南合兵攻湖  
南詔瓊以州兵合王令溫大軍攻光州尋以內難不  
果罷歸朝遣詣河北計度兵甲芻糧周祖祀南郊召  
權知宗正卿事世宗征劉崇爲北面行營都監歷絳  
蔡齊三州防禦使在齊州民饑瓊以已俸賑之人懷  
其惠相率詣闕頌其德政詔許立碑宋建隆三年告  
老加右領軍衛上將軍致仕歸洛陽乾德二年卒年

永平府志

卷五十五

鄉賢一

八

七十二瓊雖起卒伍而所至有惠政尊禮儒士孜孜  
樂善蓋武臣之賢者也

宋史

遼

趙思溫字文美盧龍人少果銳膂力兼人隸燕帥劉仁  
恭幕李存勳問罪于燕思溫統偏師拒之流矢中目  
裂裳瀆血戰猶未已爲存勳將周德威所擒存勳壯  
而釋其縛久之日見信用與梁戰於莘縣以驍勇聞  
授平州刺史兼平營薊三州都指揮使神冊二年太  
祖遣大將經略燕地思溫來降及伐渤海以思溫爲  
漢軍都團練使力戰拔扶餘城身被數創太祖親爲

調藥太宗卽位以功擢檢校太保保靜軍節度使天  
顯十一年唐兵攻太原石敬瑭遣使求救上命思溫  
自嵐憲間出兵援之旣罷兵改南京留守盧龍軍節  
度使管內觀察處置等使開府儀同三司兼郎中賜  
協謀靜亂翊聖功臣尋改臨海軍節度使會同初從  
耶律牒噶使晉行冊禮還加檢校太師二年有星隕  
于庭卒上遣使賻祭贈太師魏國公子延昭延靖官  
至使相

遼吏

劉六符平州人也年十五究通經史更兼綜百家之言  
長而喜功名慷慨有大志歷事聖宗朝爲著作郎中

永平府志

卷五十五

鄉賢一

九

允又爲詹事國子祭酒興宗時爲翰林學士右諫議  
大夫知制誥同修國史契丹聚兵幽薊來求關南時  
宋慶歷二年也先是西

一本西下有夏字

兵久不決六符以

宋朝爲怯又李士彬劉平之兵屢敗宋朝旰食積苦  
兵閒因說其主聚兵幽涿聲言南征而六符及蕭英  
先以書來求關南十縣其書皆六符所撰也書至宋  
朝富弼爲回謝使弼至沒打河六符館之謂弼曰北  
朝皇帝堅欲割地如何弼曰北朝若欲割地必志在  
敗盟南朝決不從有橫戈相待耳六符曰南朝若堅  
執則事安得濟弼曰南朝不發兵而遣使好辭更議

嫁女益幣豈堅執乎六符引弼入見往復辯議興宗大感悟乃從弼所請是年八月宋朝再遣齎國書誓書至契丹清泉淀金甌館許贈以歲幣二十萬時契丹固惜盟好惟六符畫策揚聲聚兵幽涿以動宋朝宋方困西夏之擾名臣猛將相繼敗衄呂夷簡畏之契丹既得歲幣五十萬勒碑紀功擢六符樞密使禮部侍郎同修國史後遷至中書政事令子孫顯貴不

絕為節度觀察使者十數人契丹國志案遼史列傳六符有志操能文重

熙初遷政事舍人擢翰林學士十一年與宣徽使蕭時默使宋索十縣地還為漢人行宮副部署會宋遣使增歲幣以易十縣復與耶律仁先使宋定進貢名宋難之六符曰本朝兵強將勇海內共知人人願從

永平府志

卷五十五

鄉賢一

十

事於宋若恣其俘獲以飽所欲與進貢字孰多况大兵駐燕萬一南進何以禦之顧小節忘大患悔將何及宋乃從之歲幣稱貢六符還加同中書門下平章事及宋幣至命六符為三司使以受之六符與參知政事杜防有隙防以六符嘗受宋賂白其事出為長甯軍節度使俄召為三司使道宗即位將行大冊禮北院樞密使蕭格曰行大禮備儀物必擇廣地莫若黃川六符曰不然禮儀國之大體帝王之樂不奏於野今中京四方之極朝覲各得其所宜中京行之上從其議尋以疾卒

馬保忠營州人也疏眉目豐下謹重寡欲斤斤自修士

人賢其行自力讀書不謁州縣節用以給親里大穰

則賑其餘於鄉黨太平年間授洗馬改著作郎殿中

丞興宗朝為樞密使尚父守太師兼政事令封燕國

公時朝政不綱溺志浮屠僧至有正拜三公三師者

官爵非人妄有除授保忠嘗從容進諫帝至怫然怒之詳見帝紀又嘗上言強天下者儒道弱天下者吏道今之授官大率吏而不儒崇儒道則鄉黨之行修德則冠冕之緒崇自今其有非聖帝明王孔孟聖賢之教者望下明詔痛禁絕之其篤意風教如此後數年保忠卒賜諡曰剛簡

契丹國志

金

孟浩字浩然灤州人遼末年登進士第天會三年爲樞密院令吏除平州觀察判官天眷初選入元帥府備任使除歸德少尹充行臺吏禮部郎中入爲戶部員

永平府志

卷五十五

鄉賢一

十一

外郎郎中韓企先爲相拔擢一時賢能皆置機要浩與田穀皆在尙書省穀爲吏部侍郎浩爲左司員外郎旣典選善銓量人物分別賢否所引用皆君子而蔡松年曹望之許霖皆小人求與穀相結穀薄其爲人拒之松年初事宗弼於行臺省以微巧得宗弼意宗弼富國引爲刑部員外郎望之爲尙書省都事霖爲省令史皆怨穀等毀之於宗弼凡與穀善者皆指以爲朋黨企先薨穀出爲橫海軍節度使選人龔夷鑿除名值赦赴吏部銓得預覃恩穀已除橫海部吏以夷鑿白穀穀乃倒用月日署之許霖在省典覃恩

行臺省工部員外郎張子周素與穀有怨以事至京師微知夷鑿覃恩事嗾許霖發之砥以專擅朝政詔獄鞫之擬穀與夷鑿死其妻子及所往來孟浩等三十四人皆徙海上仍不以赦原天下冤之世宗在熙宗時知田穀黨事皆松年構成之而浩等三十二人遇天德赦令還鄉里多物故惟浩與穀兄穀王補馮煦王中安在大定二年召見復官爵浩爲侍御史穀爲大理丞補爲工部員外郎煦爲兵部主事中安知火山軍事而浩尋復爲右司員外郎浩篤實遇事輒言無所隱上嘉其忠每對大臣稱之有疾求外補除

祁州刺史致仕歸七年起爲御史中丞而浩年老世宗以不次用之再閱月拜參知政事故事無自中丞拜執政者浩辭曰不次之恩非臣所敢當上曰國家用人豈拘階次卿公正忠勤雖年高猶可宣力數年朕思之久矣浩頓首謝世宗勅有司東宮涼樓增建殿位浩諫曰皇太子義兼臣子若所居與至尊宮室相侔恐制度未宜固宜示以儉德上曰善遂罷其役未幾上宴羣臣於東宮顧謂羣臣曰參政孟浩公正敢言自中丞爲執政卿等能如是朕亦不次用之浩復奏曰歷古以來不明賞罰而能治者未之聞也國

家賞善罰惡蓋已多矣而天下莫能知乞自今凡賞功罰罪皆具事狀頒告之使君子知勸以遷善小人知懼以自警從之進尚書右丞兼太子少傅爲眞定尹上曰卿年雖老精神不衰善治軍民毋遽言退以通犀帶賜之十三年薨

金史

劉敏行平州人登天會三年進士除太子校書郎累遷肥鄉令歲大饑盜賊掠人爲食諸縣老弱人保郡城不敢耕種農事廢畝畝荒蕪敏行白州借軍士三十護縣民出耕多張旗幟爲疑兵敏行率軍巡邏日暮則閱民入城由是盜不敢犯而耕稼滋殖轉高平令

永平府志

卷五十五

鄉賢一

十二

縣城圯壞久不修大盜橫恣掠縣鎮不能禦敏行出已俸率寮吏出錢僱役繕治百姓欣然從之凡用二千人版築遂完鄉村百姓入保賊至不能犯九遷爲河北東路轉運使致仕卒

金史

趙興祥平州盧龍人六世祖思溫遼燕京留守封天水郡王父瑾遼靜江軍節度使興祥以父任閤門祗候謁告省親於白霽會遼季土賊據郡作辭興祥攜母及弟妹奔燕京不能進乃自柳城涉沙磧夜視星斗而行僅達遼軍而不知遼主所向遂還柳城及婁室獲遼主興祥乃歸國從宗望伐宋爲六宅使天眷初

累官同知宣徽院事母憂去官熙宗素聞興祥孝行及英悼太子受冊以本官起復護視太子轉右宣徽使天德初改左宣徽使海陵嘗問興祥欲使子弟爲官當自言興祥辭謝海陵善之賜以玉帶詔曰汝官雖未至一品可佩此侍立爲濟南尹賜車馬金幣金銀器皿改絳陽軍節度使召爲太子少保封廣平郡王改鉅鹿正隆初例奪王爵遷太子少傅封申國公起爲定武軍節度使海陵伐宋興祥二子從軍世宗卽位海陵尚在淮南二子未得還興祥來見於平州世宗嘉其誠款以爲祕書監復爲左宣徽使久之以

永平府志

卷五十五

鄉賢一

十四

其孫珣爲閤門祇候十五年上幸安州春水召興祥赴萬春節上謁于良鄉賜銀五百兩感風眩賜醫藥

未幾卒

金史

張景仁字壽甫遼西人累官翰林待制貞元二年與翟永固俱試禮部進士以尊祖配天爲賦題忤海陵旨語在永固傳大定二年僕散忠義伐宋景仁掌其文辭宋人議和朝廷已改奉表爲國書稱臣爲姪但不肯世稱姪國往復凡七書然後定其書皆景仁爲之世宗稱其能嘗曰今之文章如張景仁與宋人往復書指事達意辨而裁真能文之士也五年罷兵入爲

翰林直學士七年選侍講八年爲詳讀官宋國書中有寶鄰字景仁奏鄰字太涉平易土問累年國書有鄰字否命一一校勘六年書中亦有之上責問六年詳讀官劉仲淵右丞石琚亦請罪曰臣嘗預六年詳讀上曰此有司之過安得一一責宰臣邪詔有司就論宋臣王瀹使歸告其主後曰國書不得復爾仲淵時爲禮部侍郎降石州刺史景仁遷翰林學士兼同修國史久之上召景仁讀陳言文字上問事款幾何景仁率易少周密對曰二十餘事復曰其中如某事某事十事可行餘皆無謂也明日上召景仁責之曰

卿昨言可行者朕觀之中復有不可行者卿謂無謂者中亦有可行者朕未嘗使卿分別可否卿輒專可否何也自今戒之十年兼太常卿學士同修國史如故轉承旨兼修國史改河南尹二十一年召爲御史大夫仍兼承旨修國史世宗謂景仁曰卿博學老儒求如古之御史大夫然後行之斯爲稱矣不能如古之人衆人不獨誚卿亦謂朕不能知人卿醉中頗輕脫失言當以酒爲戒初朝臣言景仁有文藝而頗率易不可任臺察景仁被詔就臺中治監察罪輒以便服視決罰上聞之責景仁曰朕初用卿爲大夫或言



卿不可居此官今果不用故事率易如此卿自慎不然黜罰及矣景仁頓首謝未幾詔葬元妃李氏於海王莊平章政事烏古論元忠提控葬事都水監丞高杲壽治道路不如式元忠不奏決之四十景仁劾奏元忠輒斷六品官無人臣禮上曰卿劾奏甚當使左宣徽使蒲察鼎壽傳詔戒勅元忠曰監丞六品有罪聞奏今乃一切趨辨擅決六品官法當如是耶御史在尊朝廷汝當自咎勿復再元忠尚豫國公主怙寵自任倨慢朝士景仁劾之朝廷肅然是歲薨

金史

張謹言幼名元奴平州義豐人穀之子也宗望攻下平

永平府志

卷五十五

鄉賢一

十六

州謹言在襁褓閒里人劉承宣得之養於家其鄰韓夫人甚愛之年數歲隨韓夫人得見貞懿皇后留之藩邸稍長侍世宗讀書遂使謹言主家事繩檢部曲一府憚之世宗留守東京海陵用兵江淮將士往往亡歸詣東京願推戴世宗爲天子謹言勸進世宗卽位除內藏庫副使權發遣宮籍監事陵死揚州謹言與禮部尚書烏居仁殿前左衛將軍阿虎帶御院通進劉琬發遣六宮百司國書府藏在南京者還以本職提控尚食局轉少府監丞仍主內藏謹言能心計世宗倚任之凡宮室營造府庫出納行幸頓舍皆委

之世宗嘗曰一經謹言無不愜朕意者六年提舉修  
內役事役夫掘地得白金匿之事覺法當死謹言責  
取其物與官釋其罪尋兼祇應司遷少府監提控宮  
籍監祇應司如故護作太甯宮引宮左流泉漑田歲  
穫稻萬斛十七年復提點內藏典領昭德皇后山陵  
遷勸農使諸職如故謹言雖舊臣出入左右然世宗  
終不假以權任嘗欲以爲橫海軍節度使而不可去  
左右遂止及得疾猶扶杖視事疾亟詔太醫診視近  
侍問訊相屬及卒上深惜之遣官致祭賻銀五百兩  
重綵十端絹二百疋棺槨衣衾銀汞斂物葬地皆官

永平府志

卷五十五

鄉賢一

十七

給贈輔國上將軍

金史

張行中字信輔營州人大定中進士衛王紹朝胡沙虎  
除名爲民賂遺權貴得復用行中言其必反及弒逆  
自爲太師尚書令澤王行中時爲禮部尚書人謂必  
爲所殺甚危之一日虎下禮部鑄鑑國寶行中持不  
可虎雖怒竟不敢殺也宣宗卽位授參知政事丞相  
高琪專權用事人莫敢仰視惟行中與之抗論朝廷  
稱焉

大金國志案金史及中州集俱作莒州日照人  
行中金史作行信云先名行忠避莊獻太子諱

焉改

任詢字君謨易州軍市人父貴有才幹善畫喜談兵政

宣閒遊江浙詢生於虔州爲人慷慨多大節書爲當時第一畫亦入妙品評者謂畫高於書書高於詩詩高於文然王庭筠獨以其才具許之登正隆二年進士第歷益都都句判官北京鹽使年六十四致仕優

游鄉里家藏法書名畫數百軸年七十卒

金史案郭志云考詢

本易州人官老歸休於灤後遂爲灤州義豐人州集云平生詩數千首君謨歿後皆散失今所錄皆得於傳聞之間如山居云種竹六七箇結茅三四間稍通溪上路不礙屋頭山黃葉水清淺白雲風往還戊申春晚云水邊團月微歌扇裏垂楊學舞腰南郊小隱云林邊鳥語月微書後竹花飛春又深前輩喜稱道云趙秉文題南麓書後云岱宗夫如何齊魯青未了夫如何三字幾不成語然非三字無以成下句有數百里之氣象若上句俱雄麗則一字長吉耳此前人論詩也論書亦然若有學南麓書者當以吾言

永平府志

卷五十五

鄉賢二

十八

參之元好問跋金國名公書云任南麓書如老法家斷獄網密文峻不免嚴而少恩使之治京兆亦當不在趙張三王之下張才保定志云任詢字君謨南麓易人字入聖畫入神性尤嗜畫書畫會要云君謨山水在王子端下元王暉跋任龍巖烏夜啼帖云南麓書畫京師爲最多其擊窠大書往體莊而神滯獨此帖豪放飛動超乎常度而木庵師謂醉後興逸妙能天成豈放長沙率爾而顛字圓轉之意邪然古人多得意處非一如去乖就合意居能奪三軍之氣也

元

張昇字伯高其先定州人後徙平州昇幼警敏過人學語時輒能辨字音應對異於常兒既長力學工文辭

至元二十九年用薦者授將仕郎翰林國史院編修  
官預修世祖實錄陞應奉翰林文字尋陞修撰歷興  
文署令遷太常博士成宗崩大臣承中旨議奉徽號  
饗宗廟昇曰在故典凡有事於宗廟必書嗣皇帝名  
今將何書議遂寢武宗卽位議躬祀禮昇據經引古  
參酌時宜以對帝嘉納之至大初改太常寺爲太常  
禮儀院卽除昇爲判官久之外補知汝甯府民有告  
寄束書於其家者踰三年取閱有禁書一編且記里  
中大家姓名於上昇亟呼吏焚其書曰妄言誣民且  
再更赦矣勿論同列懼皆引起旣而事聞廷議謂昇

脫姦軌遣使窮問卒無跡可指乃詰以擅焚書狀昇  
對曰事固類姦軌然昇備位郡守爲民父母今斥誣  
訴免冤濫雖重得罪不避乃坐奪俸二月旁郡移文  
報吳人侯君遠者言歲值壬子六月朔日蝕其占爲  
兵寇歲癸丑其應在吳分野同列欲召屬縣爲備禦  
計昇曰此訛言久當自息毋惑民聽斥其無稽眾論  
躡之部使者譽治行爲諸郡最歷江西行省左右司  
郎中除紹興路總管初大德至大閒越大饑且疫癘  
民死者殆半賦稅鹽課責里胥代納吏並緣爲姦害  
富家昇爲證於簿籍白行省蠲之前守有爲江淠行

省參知政事者爭代者祿米有隙欲內之罪移平江  
歲輸海運糧布囊三萬俾紹興制如數民患苦之不  
能堪更數守謂歲例如此置弗問昇言麻非越土所  
生海漕實吳郡事於越無與章上卒罷之昇既謹於  
繩吏又果於去民瘼故人心悅服歷湖北道廉訪使  
江南行臺治書侍御史召爲參議中書省事改樞密  
院判官尋復中書參議至治二年又出爲河東道廉  
訪使未行拜治書侍御史明年出爲淮西道廉訪使  
泰定二年拜陝西行省參知政事加中奉大夫尋遷  
遼東道廉訪使屬永平大水民多捐瘠昇請發海道

糧十八萬石鈔五萬緡以賑饑民且蠲其歲賦朝廷  
從之民得全活者眾明年召拜侍御史天歷初出爲  
山東道廉訪使時方有警有司請完城以爲備昇曰  
民恃吾以生完城是棄民也由是民皆安之文宗賜  
尙醞文幣以賞其功踰年召爲太禧院副使兼奉贊  
神御殿事除河南省左丞復遷淮西道廉訪使昇時  
年六十有九上書乞致仕至順二年復起爲集賢侍  
講學士文宗眷待之意甚隆元統元年順帝卽位首  
詔在廷耆艾訪問治道昇條上時所宜先者十事尋  
兼經筵官廷試進士特命昇讀卷事已告省先墓帝

賜金織文袍以寵其歸明年以奎章閣大學士資善大夫知經筵事召賜上尊趣就職昇以疾辭帝察其不可強許之尋命本郡月給祿米以終其身至正元年卒年八十一贈資德大夫河南等處行中書省左

丞諡文憲

元史

陳顥字仲明其先居盧龍有名山者仕金爲穆昆監軍太祖得之以爲平陽等路軍民都元帥子孫徙清州遂爲清州人顥穎悟日記誦千百言稍長游京師登翰林承旨王磐安藏之門磐熟金典章安藏通諸國語顥兼習之安藏乃薦顥入宿衛尋爲仁宗潛邸說

永平府志

卷五十五

鄉賢一

二十一

書於是仁宗奉母后出居懷慶顥從行日開陳以古聖賢居艱貞之道會成宗崩仁宗入定內難以迎武宗顥皆預謀及仁宗卽位以推戴舊勳特拜集賢大學士榮祿大夫仍宿衛禁中政事無不與聞科舉之行顥贊助之力尤多顥時伺帝燕閒輒取聖經所載大經大法有切治體者陳之每年嘉納帝嘗坐便殿羣臣入奏事望見顥喜曰陳仲明在列所奏必善事矣顥以父年老力請歸養清州帝特命顥長子孝伯爲知州以就養顥固辭乃以孝伯爲州判官帝欲用顥爲中書平章政事顥叩首謝曰臣無汗馬之功又

乏經濟之略一旦置之政塗徒速臣咎臣願得朝夕左右獻替可否庶少裨萬一亦以全臣愚忠帝乃允仁宗崩辭祿家居者十年文宗卽位復起爲集賢大學士上疏勸帝大興文治增國子學弟子員蠲儒生徭役文宗皆嘉納焉顥先後居集賢署薦士牘累數百有訐之者顥曰吾甯以謬舉受罰蔽賢誠所不忍順帝元統初顥扈蹕行幸上都至龍虎臺帝命造膝前而握其手曰卿累朝老臣更事多矣凡議政事宜極言無隱顥頓首謝不敏顥每集議其言無不剴切至元四年致政命食全俸於家明年卒年七十六至

五十四年贈摠誠秉義佐理功臣光祿大夫河南江北等處行中書省平章政事柱國追封薊國公諡文忠顯出入禁闈數十年樂談人善而惡聞人過大夫士因其薦拔以至顯列有終身莫知所自者是以結知人主上下無有惡尤歐陽元爲國子祭酒與顥同考試國子伴讀每出一卷顥必拾而觀之苟得其片言善卽以真選列爲之色喜元歡曰陳公之心蓋篤於仁而踰於厚者眞可使鄙夫寬薄夫敦矣次子敬伯至正中仕爲中書參知政事歷左丞右丞二十七

趙炳字彥明惠州灤陽人父宏有勇略積階奉國上將軍炳幼失怙恃鞠於從兄歲饑往平州就食遇盜欲殺之兄解衣就縛炳年十二泣請代兄盜驚異舍之而去甫弱冠以勳闕之子侍世祖於潛邸恪勤不怠遂蒙眷遇世祖次桓撫閒以炳爲撫州長城邑規制爲之一新己未王師伐宋未幾北方有警括兵斂財燕薊騷動王師北還炳遠迓中途具以事聞追所括兵及橫斂財物悉歸於民世祖嘉其忠中統元年命判北京宣撫司事北京控制遼東番夷雜處號稱難治時參知政事楊果爲宣撫使聞炳至喜曰吾屬無

憂矣三年括北京鷹坊等戶丁爲兵蠲其賦令炳總之時李壇叛據濟南炳請討之國兵圍城炳將千人獨當北面有所俘獲卽縱遣去曰脅從之徒不足治也濟南平入爲刑部侍郎兼中書省斷事官時有攜妓登龍舟者卽按之以法未幾其人死其子犯蹕訴冤詔讓之炳曰臣執法尊君職當爲也帝怒命之出旣而謂侍臣曰炳用法太峻然非徇情者改樞密院斷事官濟南妖民作辭賜金虎符加昭勇大將軍濟南路總管炳至止罪首惡餘黨解散歲凶發廩賑民而後以聞朝廷不之罪也遷遼東提刑按察使遼東



聞其來豪猾屏跡至元九年帝念關中重地風俗强悍思得剛鯁舊臣以臨之授炳京兆路總管兼府尹皇子安西王開府於秦詔治宮室悉聽炳裁製王府吏卒橫暴擾民者卽建白繩以法自是豪猾斂戢秦民以安有旨以解州鹽賦給王府經費歲久積逋三十餘萬緡有司追理僅獲三之一民已不堪炳密啟王免之會王北伐詔以京兆一年之賦充軍資炳復請曰所徵逋課足佐軍用可貸歲賦以蘇民力令下秦民大悅十四年加鎮國上將軍安西王相王府冬居京兆夏徙六盤山歲以爲常王北伐六盤守者搆

辭炳自京兆率兵往捕甫及再旬元惡授首十五年春六盤再亂復討平之王還自北嘉賞戰功賚賜有加是歲十一月王薨十六年秋被旨入見便殿帝勞之曰卿去數載衰白若此關中事煩可知已詢及民間利病炳悉陳之因言王薨之後運使郭琮郎中郭叔雲竊弄威柄恣爲不法帝聞大怒改炳中奉大夫安西王相兼陝西五路西蜀四川課程屯田事餘職如故卽令乘傳偕勅使數人往按琮等至則琮假嗣王旨入炳罪收炳妻孥囚之時嗣王之六盤徙炳等於平涼北崆峒山囚閉益嚴炳子仁榮訴於上詔近

侍二人馳驛而西脫炳且械琮黨偕來琮等留使者醉以酒先遣人毒炳於平涼獄中其夜星隕有聲如雷年五十九時十七年三月也帝聞之撫髀嘆曰失我良臣俄械琮百餘人至帝親鞫問盡得其情既各伏辜命仁榮手刃琮叔雲於東城籍其家以付仁榮仁榮曰不共戴天之人所蓄之物何忍受之帝嘉之別賜鈔萬二千五百緡爲治喪事國朝舊制無賻臣下禮蓋殊恩也六月詔雪炳冤特贈中書左丞諡忠愍子六人仁顯早亡仁表仁榮仁旭仁舉仁軌仁榮仕至中書平章政事仁舉登至元中進士知晉州餘

永平府志

卷五十五

鄉賢一

二十五

俱登顯仕

元史

明

王翱字九皋鹽山人永樂十三年初會試貢士於行在帝時欲定都北京思得北土用之翱兩試皆上第大喜特召賜食改庶吉士授大理寺左寺正左遷行人宣德元年以楊士奇薦擢御史時官吏有罪不問重輕許運甄還職翱請犯贓吏但許贖罪不得復官以懲貪黷帝從之五年巡按四川松潘蠻竊發都督陳懷駐成都相去八百餘里不能制翱上便宜五事請移懷松潘而松茂軍糧於農隙齊力起運護以官軍

毋專累百姓致被劫掠吏不給由爲民蠹令自首毋  
隱州縣土司徧設社學會川銀場歲運米八千餘石  
給軍往返勞費請令自罪者納粟自贖詔所司議詳  
運糧事而遷蠹吏此京餘悉允行英宗卽位廷議遷  
文武大臣出鎮守擢翱右僉都御史偕都督武興鎮  
江西懲貪抑奸吏民畏愛正統二年召還院四年處  
州賊流劫廣信命翱往捕盡俘以還是年冬松潘都  
指揮趙諒誘執國師商巴掠其財與同官趙得誣以  
叛其弟小商巴怒聚眾剽掠命翱及都督李安軍二  
萬征之而巡按御史白其枉詔審機進止翱至出商

巴於獄遣人招其弟撫定餘黨而劾誅諒戍得復商  
巴國師松潘遂平六年代陳鎰鎮陝西軍民之借糧  
不能償者覈免之七年冬提督遼東軍務翱以軍令  
久弛寇至將士不力戰因諸將庭謁責以失律罪命  
左右曳出斬之皆惶恐叩頭願効死贖翱及躬行邊  
起山海關抵開原繕城垣濬溝塹五里爲堡十里爲  
屯使烽燧相接練將士室鰥寡軍民大悅又以邊塞  
孤遠軍餉匱緣俗立法令有罪得收贖十餘年間得  
穀及牛半數十萬邊用以饒八年以九載滿進右副  
都御史指揮孫璟鞭殺戍卒其妻女哭之亦死他卒

訴璟殺一家三人翱曰卒死法妻死夫死父非殺也命璟償其家葬葬費璟感激後參將遼東追敵三百里事李秉爲名將十二年與總兵曹義等出塞擊兀良哈擒斬百餘人獲畜產四千六百進右都御史十四年諸將破敵廣平山進左脫脫不花大舉犯廣寧翱方閱兵寇猝至眾潰翱入城自保或謂城不可守翱手劍曰敢言棄城者斬寇退坐停俸半載景泰三年召還掌院事易儲加太子太保潯梧猺亂總兵董興武毅推委不任事于謙請以翁信陳旺易之而特遣一大臣督軍務乃以命翱兩廣有總督自翱始

翱至鎮將吏讐服推誠撫諭猺人嚮化部內無事明年召入爲吏部尚書初何文淵協王直掌銓多私爲言官攻去翱代一循成憲天順改元直致仕翱始專部事石亨欲去翱翱乞休已得請李賢力爭乃留及賢爲亨所逐亦以翱言留兩人相得歡甚帝每用人必咨賢賢以推翱以是翱得行其志帝眷翱厚時召對便殿稱先生不名而翱年幾八十多忘嘗令郎談論隨入帝問故翱頓首曰臣老矣所聆聖諭恐遺誤令此郎代識之其人誠謹可信也帝喜吏部主事曹恂已遷江西參議遇疾還翱以聞命以主事回籍恂

怒伺翱入朝捽翱胸搥其面大聲詬詈事聞下詔獄具言恂實病得斥歸時服其量五年加太子少保成化元年進太子太保雨雪免朝參屢疏乞歸輒慰留數遣醫視疾三年疾甚乃許致仕未出都卒年八十有四贈太保諡忠肅翱在銓部謝絕請謁公餘恆宿直廬非歲時朔望謁先祠未嘗私歸第每引選或值召對侍郎代選歸雖暮必至署閱所選惟恐有不當也論薦不使人知曰吏部豈快恩怨地耶自奉儉素景帝知其貧爲治第鹽山孫以蔭入太學不使應舉曰勿妨寒士路壻賈傑官近畿翱夫人數迎女傑恚

曰若翁典銓移我官京師反手爾何往來不憚煩也夫人聞之乘閒請翱翱怒推案擊夫人傷面傑卒不得調其自遼東還朝也中官同事者重翱贖明珠數顆翱固辭其人曰此先朝賜也公得毋以贓卻我乎不得已納而藏焉中官死召其從子還之爲都御史時夫人爲娶一妾逾半歲語翱翱怒曰汝何破我家法卽日具金幣返之妾終不嫁曰豈有大臣妾嫁他人者翱卒妾往奔喪其子養之終身李賢常語人曰皋陶言九德王公有其五亂而敬擾而毅簡而廉剛而塞強而義也然性頗執嘗有詔舉賢良方正經明

行修及山林隱逸士至者率下部試翱黜落百不取  
一二性不喜南士英宗嘗言北人文雅不及南人顧  
質直雄偉緩急當得力翱由是益多引北人晚年徇  
中官郭聰屬爲都御史李秉所劾翱自引伏蓋不無  
小損云子孫世官錦衣千戶

明史案王忠肅本灤州人入鹽山籍今從灤志載之又案獻徵錄云景泰三年南蠻寇兩廣兩廣副總兵董興武毅觀望不戰巡撫侍郎揭稽李棠不相統賊益熾于少保請用安遠侯柳溥總督兩廣軍務如溥未可出臣謙及戶部尚書金濂王翱乞用一人上用翱明年蠻平召還臺是年陞吏部尚書

翟鵬字志南撫甯衛人正德三年進士除戶部主事歷員外郎中出爲衛輝府知府調開封擢陝西副使進

永平府志

卷五十五

鄉賢二

二十九

按察使性剛介歷官以清操聞嘉靖七年擢右僉都御史巡撫甯夏時邊政久弛壯卒率占工匠私役中官家守邊者並羸老不任兵又番休無期甚者夫守墩妻坐鋪鵬至盡清占役使得迭更野雞臺二十餘墩孤懸塞外久棄不守鵬盡復之歲大侵請於朝以賑坐寇入停俸復坐劾總兵官趙英失事爲所訐奪職歸二十年八月俺答入山西內地兵部請遣大臣督軍儲因薦鵬乃起故官整飭畿輔山西河南軍務兼督餉鵬馳至俺答已飽去而吉囊軍復寇汾石諸州鵬往來馳驅不能有所挫寇退乃召還明年三月

宣大總督樊繼祖罷出鵬兵部右侍郎代之上疏言將吏遇被掠人牧近塞宜多方招徠殺降邀功者宜罪寇入官軍遏敵雖無功竟賴以安者當錄若賊眾我寡奮身戰雖有傷折未至殘生民者罪當原於法俘馘論功損挫論罪乃有摧鋒陷陣不暇斬首而在後掩取者反積級受功有逡巡觀望幸苟全而力戰當先者反以損軍治罪非戎律之平帝皆從其議會  
有降人言寇且大入鵬連乞兵餉帝怒令革職閒住因罷總督官不設鵬受事僅百日而去其年七月俺答復大入山西縱掠太原潞安兵部請復設總督乃

起鵬故官令兼督山東河南軍務巡撫以下並聽節制鵬受命寇已出塞卽馳赴朔州請調陝西薊遼客兵八支及宣大三關主兵兼募土著選驍銳者十萬統以良將列四營分布塞上每營當一面寇入境游兵挑之誘其追諸營夾攻脫不可禦急趨關南依牆守邀擊其困歸帝從之鵬乃浚濠築垣修邊牆三百九十餘里增新墩二百九十二護墩堡一十四建營舍一千五百閒得地萬四千九百餘頃募軍千五百人人給五十畝省倉儲無算疏請東自平刑西至偏關畫地分守增游兵三支分駐雁門甯武偏關寇攻

牆戍兵拒游兵出關夾攻此守中有戰東大同西老營堡因地設伏伺寇所向又於宣大三關閒各設勁兵而別選戰士六千分兩營遇警令總督武臣張鳳隨機策應此戰中有守帝從其議且命自今遇敵逗留者都指揮以下卽斬總兵官以下先取死罪狀奏請先是鵬遣千戶火力赤率兵三百哨至豐州灘不見寇復選精銳百遠至豐州西北遇牧馬者百餘人擊斬二十三級奪其馬還未入塞寇大至官軍饑憊盡棄所獲奔鵬具實陳狀帝以將士敢深入仍行遷賞舊例兵皆團操鎮城聞警出戰自邊患熾每夏秋閒分駐邊堡謂之暗伏鵬請入秋悉令赴塞畫地分守謂之擺邊九月閒還鎮遂著爲令二十三年正月帝以去歲無寇爲將帥力降敕獎鵬賜以襲衣至三月俺答寇宣府龍門所總兵官郤永等郤之斬五十一級論功進兵部尙書帝倚鵬殄寇錫命屢加所請多從而責效甚急鵬亦竭智力然不能呼吸應變御史曹邦輔嘗劾鵬鵬乞罷不允是年九月薊州巡撫朱方請撤諸路防秋兵兵部尙書毛伯溫因併撤宣大三關客兵俺答遂以十月初寇膳房堡爲郤永所拒乃於萬全右衛毀牆入由順聖川至蔚州犯浮屠



峪直抵完縣京師戒嚴帝大怒屢下詔責鵬鵬在朔  
州聞警夜半至馬邑調兵食復趨渾源遣諸將遏敵  
御史楊本深劾鵬逗留致賊震畿輔兵科戴夢桂繼  
之遂遣官械鵬而以兵部左侍郎張漢代鵬至下詔  
獄坐永戍行至河西務爲民家所窘告鈔關主事杖  
之廠衛以聞復逮至京卒於獄人皆惜之初鵬在衛  
輝將入覲行李蕭然通判王江懷金遺之鵬曰豈我  
素履未孚於人耶江慙而退其介如此隆慶初復官

明史案畿輔人物考云鵬抽分務光出守衛輝卓有  
異聲上計考天下第一扁於部楹至守開封有並包  
之謠巡撫甯夏釐奸革弊著有邊籌錄嘉靖二十三  
年虜大入寇鵬時爲兵部左侍郎總督宣大等處督

永平府志

卷五十五

鄉賢二

三十一

兵追勦晉秩本兵設策生擒逆酋王三奪韃馬器具  
甚眾爲宣大第一捷竟以過直被逮卒於官嘗有句  
云惟有寸丹懸帝闕更無尺素達權門則忌者之陷  
害亦可想見又案山西通志鵬總督宣大偏保等處  
軍務首疏預集兵馬亟處軍餉招撫叛亡申明賞罰  
四事俱蒙嘉納以不合於桂州相同籍遂廢總督不  
設復

詹榮字仁甫山海衛人嘉靖五年進士授戶部主事歷  
郎中督餉大同值兵變殺總兵官李瑾總督劉源清  
率師圍城久不下榮素有智略善應變叛卒掠城中  
無犯榮者外圍益急榮密約都指揮紀振游擊戴濂  
鎮撫王甯同盟討賊察叛卒馬昇楊麟無逆志乃陽  
令甯持官民狀詣源清所爲叛卒乞原而陰以榮謀

告請宥昇麟死畀三千金俾募死士自効會源清已  
罷巡撫樊繼祖許之昇麟遂結心腹擒首惡黃鎮等  
九人戮之榮乃開城門延繼祖入復捕斬二十六人  
錄功擢光祿寺少卿再遷太常寺少卿二十二年以  
右僉都御史巡撫甘肅魯迷貢使留甘州者九十餘  
人總兵官楊信驅以禦寇死者十之一榮言彼以好  
來而用之鋒鏑失遠人心且示中國弱詔奪信官權  
死者送之歸番人感悅踰年以大同巡撫趙錦與總  
兵官周尙文不相能詔榮與錦易任俺答數萬騎入  
掠榮與尙文破之黑山陽進右副都御史寇復大舉

犯中路參將張鳳等陣歿榮與尙文及總督翁萬達  
嚴兵備陽和而遣騎邀擊多所殺傷寇乃引去代府  
奉國將軍充灼行剽榮奏奪其祿充灼等結小王子  
入寇謀據大同榮告尙文捕得皆伏辜以大同無險  
乃築東路邊牆百三十八里堡七墩臺百五十四又  
以守邊當積粟而近邊宏賜諸堡三十一所延互五  
百餘里關治之皆膏腴田可數十萬頃乃奉請召軍  
佃作復其租徭移大同一歲市馬費市牛賦之秋冬  
則聚而遏寇帝立從焉寇入犯與尙文破之彌陀山  
斬一部長榮先以靖亂功進兵部右侍郎又以繕邊

破敵累被獎賚召還理部事進左尚書趙廷瑞罷榮署部務奏行秋防十事已而翁萬達人爲尚書遭母喪榮復當署部務辭疾乞休帝怒奪職閒住越二年卒當榮之撫之同也萬達爲總督尚文爲總兵三人皆有才略寇數入不能得志自後代者不能任寇無歲不入躡邊人益思榮等明年俺答薄京師萬達榮皆已去論者謂二人在寇未必至此萬厯中榮孫延爲順天通判上書訟榮功贈工部尚書予卹如制明史厲汝進字子修灤州人嘉靖戊戌進士授池州推官徵拜吏科給事中湖廣巡撫陸杰以顯陵工成召爲工

永平府志

卷五十五

鄉賢一

三十四

部侍郎汝進言杰素犯清議不宜佐司空並劾尚書甘爲霖樊繼祖不職不納三遷至戶科都給事中戶部尚書王杲下獄汝進與同官海甯查秉彝馬平徐養正巴縣劉起宗章邛劉祿合疏言兩淮副使張祿遣使入都廣通結納如太常少卿嚴世蕃府丞胡奎等皆承賂受囑有證世蕃竊弄父權嗜賄張燄詞連倉場尚書王暉嵩上疏自理且求援於中官以激帝怒帝責其代杲解釋命廷杖汝進八十餘六十並謫雲南廣西典史明年嵩復假考察奪汝進職隆慶初

起故官未至京師卒祀鄉賢

明史案畿輔人物考汝進佐池州十年判疑獄

者七撫按賢之凡諸郡大獄皆質成道路有神明之  
頌建德徐紳爲諸生以事逮繫汝進奇其才特釋之  
後紳舉進士至都御史巡撫順天而稱門下士人咸  
服其識鑒直聲遠震外夷高麗使人貢時問屬給事  
安否其名重如此居鄉二十餘年徜徉泉石詩酒自  
娛好義樂施濟貧赴急不計勞之輕重囊之有無也  
隆慶踐祚方復原官尋卒年五十有九歲寒老人曰  
子修其人如玉苦學博覽里中名士多出其門侍父  
疾嘗三月不解帶舉孝廉或有以百金助息者  
悉卻之生平建樹已預卜於未入官之前矣

白瑜字紹明永平人萬曆二十三年進士選庶吉士授  
兵科給事中帝既冊立東宮上太后徽號瑜請推廣  
孝慈以敦儉持廉惜人才省冤獄四事進皆引祖訓  
及先朝事以規時政辭甚切帝不能用三十年京師  
旱陝西河州黃河竭禮官請修省瑜言修省宜行實

永平府志

卷五十五

鄉賢一

三十五

政今逐臣久錮纍臣久羈一蒙矜釋即可感格天心  
至礦稅一事率土哀號今江右潘相遼左高淮淮上  
陳增畿輔王虎滇南楊榮粵東李鳳關西梁永其民  
甘心久矣恐瓊林大盈之儲不足當斬木揭竿之費  
也亦不報累遷工科都給事中帝於射場營乾德臺  
瑜抗疏力諫又再疏請斥中官王朝棟永壽帝不能  
無憾會瑜論治河當專任遂責其勤拾陳言謫廣西  
布政司照磨以疾歸光宗立起光祿少卿三遷太常  
卿給事中倪思輝朱欽相王心一以直言被謫瑜抗  
疏論救天啟二年由通政使拜刑部右侍郎署部事

鄭貴妃兄子養性奉詔遞籍逗留不去其家奴張應登訐其通塞外永甯伯王天瑞者顯皇后弟也以后故銜鄭氏遂偕其弟錦衣天麟交章劾養性不軌瑜以鄭氏得罪先朝而交通事實誣乃會都御史趙南星大理卿陳于廷等讞上其獄請抵奴誣告罪勒養性居遠方制可明年進左侍郎卒官贈尚書

明史

趙勝字克功遷安人襲職爲永平衛指揮使正統末禦寇西直門進都指揮僉事天順初與孫鏜等預奪門功超遷都督僉事又與鏜擊反者曹欽進同知孛來犯甘肅勝與李果充左右參將從白圭西征至固原

永平府志

卷五十五

鄉賢一

三十一

擊寇卻之憲宗立典鼓勇營訓練成化改元山西告警拜將軍次雁門寇已退乃還明年復出延綏禦寇會方納款遂旋師尋典耀武營四年充總兵官鎮遼東七年召典五軍營已改三千營虬加思蘭犯宣府詔勝爲將軍統京兵萬人禦之亦以寇遁召還久之進左都督太子太保十九年封甯昌伯勝初與李果並有名後屢督大師未見敵無功夤緣得封名大損後加太保營萬貴妃瑩墮崖石閒死贈侯諡壯敏宏治初孫鑑乞封爵吏部言勝無功不當傳世乃授錦

衣衛指揮使

明史附孫鏜傳案畿輔人物考云勝系出漢充國之裔世居河朔至伯父赤考

再興國初徙家永平之遷安勝職秩甫髻齷賴母  
王矢節育教剋志勵行事母極孝正統己巳寇犯  
京畿勝率兵出西直門扼其衝突躬履戰陣斬馘無  
算景泰庚子擢僉都閩英廟復辟錄其舊勞加僉前  
軍都督府事佩刀侍衛天順戊寅選管三千營操辛  
巳秋曹孽叛逆勝擒獲功多遷都督同知時寇深  
入陝西固原勝率師勤敗之憲宗嗣統命兼鼓勇營  
典操進榮祿大夫成化己酉聞風渡河趨大勝董軍應  
役明年秋勝往延綏營戍子夏海西諸夷弗靖廷款入  
貢師旋卽典操耀武酋聞風渡河趨大勝董軍應  
以勝總鎮之佩征度有方屢奏捷勅獎諭辛卯春  
號令簡閱軍士調度辰春調三營是夏至甲戌秋  
召回總典五軍營壬辰春調三營是夏至甲戌秋  
兩奉制勅佩印總師西北征輒遠卻丙申督軍士  
濬築京城垣塹兼葺西直門樓陞後軍都督戊戌  
加太子太保癸卯勅封昌平午加太保丁未董  
工造墳於天壽山之西南觸暑邁疾輿歸遂不  
起贈昌甯侯諡壯敏歲老人曰公克敵之功固多  
而濬築甯造功亦不少予謂濬築營造猶可因人成  
事而克敵則生死呼俄頃之間論功者應自有辨

永平府志

卷五十五

鄉賢二

三十七

周璽字廷玉遷安人嗣職爲開平衛指揮使負氣習兵  
書善騎射以征北功擢署部指揮僉事充右參將分  
守陽和敕部兵三千訓肄聽調成化十六年從王越  
征威甯海子累進都指揮使時邊寇無虛歲十八年  
分道入掠璽與游擊董昇戰黑石崖有功進都督僉  
事遷大同副總兵十九年秋亦思馬因大人大同總  
兵官許甯分遣璽守懷仁璽聞中軍失利亟還兵援  
夜遇敵乘勝前銳甚厲將士曰今日有進無退大呼  
陷陣敵少卻久之短兵接臂中流矢拔鏃戰益急與  
子鵬及麾下壯士擊殺數十人敵乃退無何復入掠

時諸將多失利許甯以下獲罪而璽以功予實授尋以右副總兵分守代州兼督偏頭諸關著功北邊稱名將璽以偏頭去太原遠請改分守為鎮守又以鎮守不當聽節制乞易總兵銜憲宗皆曲從之宏治初移鎮陝西討平扶風諸縣附籍回回三年佩征西將軍印鎮守甯夏甫一歲卒將死召諸子曰吾佩印分閩分已足獨未嘗大破敵抱恨入地矣連呼殺賊而

瞑子鵬累官錦衣衛千戶

明史附劉甯傳案談遷國權璽公廉敏決邊備一新

三軍甲冑外又備氈帽青布甲陣前迭出以示眾馬鞍絆各二備不虞烽燧甚明後為郃永更定遂失其法又案畿輔人物考云璽英之子成化丙午英以老謝事璽代為指揮使又云臨卒目絕忽大呼曰好殺

永平府志

卷五十五

鄉賢二

三十八

好殺遂瞑年四十有二歲寒老人曰臂中流矢拔鏃督戰至瞑目大呼好殺好殺純是一團義烈之氣余每見文士輕薄武人若廷玉者當斂衽事之

馬永字天錫遷安人生而魁岸驍果有謀習兵法好左氏春秋嗣世職為金吾左衛指揮使正德時從陸完擊賊有功進都指揮同知江彬練兵西內永當隸彬稱疾避之守備遵化寇入馬蘭峪參將陳乾被劾擢永代戰柏崖白羊峪皆有功十三年進都督僉事充總兵官鎮守薊州盡汰諸營老弱聽其農賈取傭值給健卒由是永所將獨雄於諸鎮武宗至西峯口欲出塞永叩馬諫帝注視久之笑而止中路擦崖當敵

衝無城堡耕牧者輒被掠永令人持一月糧營崖表  
版築其內城廨如期立乃遷軍守之錄功進署都督  
同知嘉靖元年金山礦盜作亂遣指揮康雄討平之  
塞其礦朵顏把兒孫結諸部邀賞不得盜邊永迎擊  
洪山口而伏兵斷其後斬獲過當進右都督已復馘  
其驍將把兒孫不敢復擾邊大同兵變殺巡撫張文  
錦命桂勇爲總兵官往鎮而議將撫之永言逆賊干  
紀朝廷赦其脅從恩至渥也顧猶抗命今不勦春和  
北寇南牧叛卒勾連禍滋大矣宜亟調鄰鎮兵剋期  
攻城曉譬利害縣破格之賞令賊自相斬爲功元凶

不難殄也乃命永督諸軍與侍郎胡瓚往會亂平乃  
還鎮永上書爲陸完請恤典且乞宥議禮獲罪諸臣  
帝大怒奪永官寄祿南京後府巡按御史邱養浩言  
永仁以恤軍廉以律已固邊防卻強敵軍民安堵資  
彼長城聞永去遮道乞留且攜子女欲遂逃移夫陸  
完久死炎瘴非有權勢可託永徒感國士知欲效區  
區之報不負知己甯負國家祈曲賜優容俾還鎮順  
天巡撫劉澤及給事御史交章救之俱被譴永竟廢  
不用永杜門讀書清約如寒士久之用薦僉書南京  
前府大同軍再亂廷臣交薦召至已就撫復還南京



十四年遼東兵變罷總兵官劉淮以永代之太清堡  
守將徐顥誘殺大甯衛九人部長把當孩怒寇邊永  
擊斬之其族屬把孫借朵顏兵報讐復爲永所卻已  
復入犯中官王永戰敗永坐戴罪遼東自軍變後首  
惡雖誅漏網者眾悍卒無所憚結黨叫呼動懷不逞  
廣甯卒佟伏張鑑等乘旱饑倡眾爲亂諸營軍憚永  
無應者伏等登譙樓鳴鼓大譟永率家眾仰攻千戶  
張斌被殺永戰益力盡殲之事聞進左都督永畜士  
百餘人皆西北健兒驍勇敢戰遼東變初定帝問將  
於李時時薦永且曰其家眾足用也帝曰將須文武

兼甯專恃勇乎時曰遼土新定須有威力者鎮之至  
是竟得其力都御史王廷相言永善用兵且廉潔仍  
宜用之薊鎮作京師蕃屏未及調卒遼人爲罷市喪  
過薊州人亦灑泣兩鎮並立祠永爲將厚撫閒謀  
得敵人情僞故戰輒勝雅知人所拔卒校後多至大

帥尚書鄭曉稱永與梁震有古良將風

明史案畿輔人物考云永

世金吾左衛指揮使父榮鎮番參將永襲父官機警  
善騎射江彬統宣府兵練西內永以千總隸彬稱病  
不起彬強起稱病篤以故得脫彬禍又云善知人獎  
拔蕭往劉淵祝雄皆起列校爲方鎮子應乾世襲錦  
衣衛指揮使古僕開爽絕去脂韋性嗜書清苦不異  
寒士汎覽百家精詩文成一言之著集數卷歲  
寒老人曰公以千總隸江彬稱病篤得脫彬禍  
此其智識過人遠矣固知其能到處立功也

